

SIUKANG ER A BELAU



Written by
Rengulbai Ngeburch
Masaharu Tmodrang

Illustrated by
Calvin Fujioka

OMESODEL TIA EL BABIER

Tia el hong a ua longeru el bliongel er se el hong el mlotobed er kemam er uchei el ngklel a **CUSTOM ER A BELAU**. Tia el hong a di ua se el kot el mlotobed el dirkak lsa el cherrengelel er a kemam.

Ng dirk ua lucheel a omesubel a Belau. A lsekum e ng ngar er ngii a cheleuid er ngii me a lechub el ko er a mo rrau a rengmiu er ngii e aki kmal lolengit er kemiu a remenguii er tia el hong me msbedemam me dekaingeseu el rullii el mo ungil. Kemam a kmal ungil a rengemam el ngmai a ngeso er kemiu me de kaingeseu el rullii tia el hong el mo ungil el kirir a rengeleked.

Tia el hong a lluches el oltirakl er a llechul a omelechesel a tekoi er a Belau el miltib er se er a July 1972.

OMERENG EL SAUL

Ng somam kemam el mĩruul er tia el hong el Rengulbai Ngeburch, Masaharu A. Tmodrang me a Palau High School el nguu tia el techall e oureng a sulir tirka el chad el ngilsukemam el meruul er tia el hong. Tirka el chad a ullengeseu er kemam er a omesodel a bebil er a tekoĩ el mlo diak kimodengei. Te kmal mlo mesaul er a ungil reng er tir me a ungil klaingeseu er tir me a uchul me tia el hong a mlo sebechef el motobed. Aki kmal mui el oureng a sulir. Aikakid a ngklir tirke el chad el kmal mlo mesaul el lolengeseu er kemam. A lengar er ngii a mlechoit a ngklef e aki dirrek el mereng a sulef.

<i>Ibedul Ngoriakl</i>	<i>Ngiraiobei Rehuher</i>
<i>Ngiratulemau Iyar</i>	<i>Iechaderchemai Sumang</i>
<i>Bilung Ngerdokou</i>	<i>Rebelkuul Demei</i>
<i>Obak Erungel</i>	<i>Dirrengermeu Ukong</i>
<i>Ngiraklang Malsol</i>	<i>Sumech Metauu</i>
<i>Talobak Thomas</i>	<i>Rechucher Salii</i>
<i>Tkedesau Mad</i>	<i>Reklai Lomisang</i>
<i>Spis Sochai</i>	<i>Dirradai Merii</i>
<i>Madrengebuked Ngirturong</i>	<i>Dirrangilengii Obkal</i>
<i>Uchelbelau Siou</i>	<i>Ngirakebou Demei</i>
<i>Oukerdeu Waikasang</i>	<i>Espangel Esebei</i>
<i>Blitang Uong</i>	<i>Obakeriong Imeong</i>
<i>Rechuldak ra Tang Adelbai</i>	<i>Ngiraibiochel Ucherbelau</i>

*A kmal klou el omereng el saul a mo er a Rengulbai
Ngeburch el ngii a kmal mle uchul e tia el hong a mlo
sebechel el tuobed. Ngika el rubak a ullisechakl er a Palau
High School el mle ta er a kmal mle ngar er a bab el ungil
el sensei. Aki kmal uluukerbai er ngii er a betok el
omesodel a tekoí er a Belau. A sulel a diaak el sebechemam
el lmuches me a ka el sebechemam el kokad me ng di mo
seluk er a chelsel a rengmam, kemam el sensei me a
rengalek er a skuul el mo er a ulebongel er kemam.*

Masaharu A. Tmodrang

KOT EL BLIONGEL

BELAU

A Belau a ta er a iungs er a chelsel a Micronesia. Ng betok el iungs el mo dmak e okedongall el kmo Belau. Aika el ings a kot el mo bedul a Ngebard a iungs er a Micronesia.

A klungel a Belau a **190 square miles**. A kot el klou el iungs er a Belau a Babeldaob, a ongerung a Beliliou, a ongedei a Oreor, a ongeuang a Ngeaur, a ongeim a Sonsorol, e ng mo Ngcheangel, e ng Meriil, e ng Pulo Anna, e a kot el kekerei a Hatohobei

A Belau a blii el mo erung el bliongel. Ng ngar er ngii a Desbedall me a Kiukl.

A Reklai a ua lorreder er a Desbedall me a Ibedul a ua lorreder er a Kiukl.

Me aikakid a beluu er a Belau el blii el Desbedall me a Kiukl. Ke dirrek lousbech a beches el ngklel me a mechut el ngklel.

Aika el beluu er a Belau a ngar er ngii a mekekerei el beluu el ngar er a chelsel el doleker el kmo rengedel se el beluu. Aikakid aike el beluu er a Desbedall me aike el mekekerei el rengedel.

DESBEDALL

Bechas el Ngakl

1. Ngcheangel
2. Ngarchelong
3. Ngaraard
4. Ngiwal
5. Melekeok
6. Ngchesar

Mechut el Ngakl

1. Ngedebuul
2. Rteluul
3. Kerradel
4. Kiueluul
5. Ngetelngal
6. Oldiais

KIUKL

Beches el Ngakl

1. Ngardmau
2. Ngeremlengui
3. Ngatpang
4. Imeliik (Aimelii)
5. Irrai (Airai)
6. Oreor (Koror)
7. Beliliou (Peleliu)
8. Ngeaur (Angaur)
9. Sonsorol
10. Hatohobei
11. Meriil
12. Pulo Anna

Mechut el Ngakl

1. Ongedechuul
2. Imeungs
3. Ngerdubech
4. Ngerbungs
5. Belias
6. Ernguul
7. Odesangel
8. Edeaur
9. Sungesol
10. Tochohei
11. Meriil
12. Bul

DESBEDALL

Beluu er a Desbedall me a rengedel:

<u>Beluu</u>	<u>Merreder</u>
1. Ngcheangel	Rdechor
a. Ngerdilog	Obakerusong
b. Ngerdimes	Obak er a Kelau
2. Ngarchelong	Uong er Etei
a. Ngebei	Ngiraureked
b. Ngerbau	Obakerbau
c. Ollei	Tet
d. Iebukel	Obak er a Iebukel
e. Ngermetong	Riungel
f. Ngriil	Iechad er a Butelbai
g. Mengellang	Uong er Etei
3. Ngaraard	Madrengebuked
a. Ulimang	Beches
b. Elab	Ngirarois
c. Ngebudek	Madrengebuked
d. Ngkeklau	Rechebal
e. Choll	Ngirameketii
4. Melekeok	Reklai
a. Ngeburch	Ngetibuchel
b. Ngeruliang	Ngirakumer
c. Ngermelech	Secharuleong
d. Ngerang	Iobech
e. Ngerubesang	Ngiraingas
5. Ngiwal	Uong
a. Ngercheluuk	
b. Ngermechau	Ngirngeschei
6. Ngchesar	Ngirakebou
a. Ngeruikl	Techetbos
b. Ngeraus	Desengang

- c. Ngchesar
- d. Ngerkesou
- e. Ngerngesang
- f. Ngersuul

- Ngirakebou
- Ngiracheruang
- Ngirchoiremech
- Obakermechuu

KIUKL

Beluu er a Kiukl me a rengedel:

- | <u>Beluu</u> | <u>Merreder</u> |
|------------------|----------------------|
| 1. Ngardmau | Beouch |
| a. Urdmau | |
| b. Ngerutoi | Arbedul er a Tebelak |
| c. Ngetbong | |
| 2. Ngeremlengui | Ngirturong |
| a. Imeong | Ngirturong |
| b. Ngermetengel | Ngiradilubech |
| c. Ngirutechei | Uchelrutechei |
| d. Ngchemsed | Beches |
| e. Ngereklong | Secharkebur |
| 3. Ngatpang | Rekemsik |
| a. Mechebechubel | |
| b. Ngatpang | |
| 4. Imeliik | Rengulbai |
| a. Medorm | Uchel |
| b. Ngchemiangel | Melachelbeluu |
| c. Elechui | Rebluud |
| d. Ngerkeai | |
| e. Imul | Sechalraimul |
| 5. Irrai | Ngiraked |
| a. Ngchesechang | Spis |
| b. Oikull | Ngirachitei |
| c. Ordomet | Ngiraked |
| d. Ngerusar | Tuchermel |
| e. Ngeruluobel | Iechader Teluang |
| f. Ngetkib | Techedib |

6. Oreor	Ibedul
a. Ngermid	Remeliik
b. Ngerkesoaol	Adelbai
c. Ngerchemai	Iechaderchemai
d. Ibukel	Rdulaol
e. Ngerbeched	Iechadribukel
f. Ngerekebesang	Espangel
g. Meyuns	Uchel

7 Beliliou	Obak
a. Ngesias	Uchelsias
b. Ngerdelolek	
c. Ngerkeiukl	Aderkeroi
d. Ngerechol	Obaklchol
e. Teliu	

Beches el Beluu

- f. Klouklubed
- g. Uosech
- h. Imelchol

8. Ngeaur	Ucherbelau
a. Ngerbelau	Ucherbelau
b. Ngebeanged	Renguul
a. Ngermasech	Ucheremasech
b. Rois	Ucherkemul

Note: A beluu er a Ngeaur a ua tiaked a teletelel. Ng ngar er ngii a eua el saus er ngii er a chelechang el taem. Aikakid el ngar er a bab. Se el lobii a beluu el di mo eru el saus e a Rois me a Ngeremasech a mo dmak e a Ngebeanged me a Ngerebelau a mo dmak me ng di mo Ngeremasech me a Ngerbelau. A Ucherremasech a ngar er a bita el beluu me a Ucherbelau a ngar er a bita el beluu. Ng diak el sebechel a Ucherremasech el mo mesaod er a Ngerbelau me a Ucherbelau me ng diak el lbe losaod er a Ngeremasech.

OMOACHEL ME A ROIS

A Belau a dirrek el ngar er ngii a meklou el omoachel er ngii. Aika el omoachel a ngar er ngii er a dersta el beluu er a Belau. Ng diak el di lengar er ngi er a rokui el beluu. Aikakid a omoacher er a Belau me aike el beluu el lengar er ngii.

Ngklel a Omoachel

1. Ngerdorech
2. Ngermeskang
3. Tabecheding
4. Ngerbekuu
5. Ngerikiil
6. Ngertebechel
7. Ngchemiangel

Beluu el lengar er ngii

Ngersuul, Nchesar
Ngeremlengui
Ngatpang
Ngiwal
Irrai
Ngardmau
Imeliik

A Belau a di ta el beluu er a Micronesia el ngar er ngii a klou el diong er ngii. Tia el diong a ngar er a **Melekeok**. A ngklel tia el **diong** a **Ngerdok**.

Se el domes er a Belau e ng betok a mekididai er ngii. Aika el mekididai a doleker el kmo Rois. Ng ngar er ngii a kleai el mekididai el rois er a Belau. Aikakid a ngklel aika el rois er a Belau me a beluu el lengar er ngii.

Ngklel a Rois

1. Ngerchelechuus
2. Etiruir
3. Ngeruach
4. Ngulitel
5. Roisersuul
6. Roisechesar
7. Ngedech
8. Ngerkebekebul

Beluu el lengar er ngii

Ngardmau
(713 ft telongoklel)
Ngeremlengui
Ngeremlengui
Ngkeklau
Ngersuul, Ngchesar
Ngchesar
Ollei
Irrai

CHUTEM ER A BELAU

A chutem er a Belau a ngar er ngii a ede el bedengel. Ngar er ngii a chelechol, chutem (clay) el dousbech el meruul a bekai, olekall me a di chutem el dolalem a dellomel er ngii. Aika el chutem a mechedelekelek el ua mesei me a kuk cheriich e ng di sebechel el dubech a dellomel me a kerrekarak er ngii.

KLALO EL MENGAI ER A CHUTEM ME A DAOB (NATURAL RESOURCES)

A Belau a ta er a iungs er a Micronesia el ngar er ngii a klalo el mengai er a chetemel. Ng ngar er ngii a **Ringko** (phosphate) me a **Chidudes** (bauxite).

A ringko a dechil a suebek el charm el meketeketang el medechel er a chelsel a chutem. Aika a lulengiis a rechad er a Dois me a Siabal e meruul el mo koyas. A ringko a debetik er a Ngeaur me a Beliliou. A beluu el milengai a ringko er ngii a beluu er a Ngeaur. A rechad er a Siabal a milngiis a ringko el mo lmuut er a 1954 e ng mlo diak el longiis.

A chidudes (bauxite) a kuk debetik er a Ngardmau me a Ngeremlengui. Aikang a di lullai a rechad er a Siabal el mlo meruul a ta er a bedengel a deel. Te di millai er se el temel a Siabal el ngar er a Belau e a uriul er a ongeru el mekemad e ng mlo diak el lolai.

NGIKEL ME A KAI

Aike el kuk mengai er a daob el klalo a ngikel me a kai. A ngikel a dolai el mo odoim me a mo kanzume. Aike el ngikel el mo kanzume a tekuu (katsuo/tuna). A ngikel er a kereker me a kuk di ngodech el meklou el ngikel a di dolai el mo odoim.

A kai a lolai a regebard el mo besiich me a dirrek el meruul el mo bek el bedengel a klalo. A kot el klou a belkul el sebechel el mo uchul a kerrekerngir a rechad el kai a semum. Ngar er ngii a taem e ng mo subed el rechad er a Belau a mo meruu a semum el mo olterau. Ng diak el di ngii el taem el sebechir a rechad el meruu a semum el olterau.

DELLOMEL

A Belau a ngar er ngii a bek el bedengel a dellomel er ngii. Ng ngar er ngii a dellomel el kall a techel el ua diokang, brak, kukau, chemuti, telengot me a kuk bebil. Ng dirrek el ngar er ngii a dellomel el kuk kall a redechel. Aika el dellomel a nger er ngii a tuu, bobai, meduu, lius, sausab, ongolngebard, rebotel, me a kuk bebil. A Belau a ngar er ngii a betok el bedengel a kerrekar el dubech er ngii. Ng ngar er ngii a meklou el kerrekar el sebeched el ousbech el meruul el mo mlai me a mo blai. A dort a ta er a kmal mesisiich el kerrkar el dousbech el meruul a blai. A meduu me a btaches a lulusbech a rechad er a irechar el meruul a mlai. A chereomel a mui er a kuk bebil er a bedengel a kerrekar el di kelel a charm a redechel.

ONGERUNG EL BLIONGEL

UCHELEL ME A KLENGAR ER A BELAU

Cheldech duch el chelid el mesaod er a uchelel a Belau

A Kim a mla er a Lukes el delonge lelel a Ngeaur me a Beliliou a milechellii a Latmikaik. Ngika el Latmikaik a milechellii a Uchererak el sechal me a Chuab el dirrek el sechal me a Iluochel el redil. A Uchererak a mlo Uchelianged a Chuab a mlo er a Ngetelkou er a Ngerau e mlo metongakl el chad me te dmul a ochil me ng muukel el me beluu er a Belau.

A Kiukl a delel me a Desbedall a ulkel. Tiakid a ua luchul e a chelemoll er a Kiukl a cheroid e a chelemoll er a Desbedall a kmeed. A Rrenged a ua leblo lechiklele e a Ngarchelong a bdelul, isei a uchul me ng Euidrechelong.

A Iluochel er a lenga er a Ngeaur e ng mle Dillebuu a ngklele e me er a Ngeriab er a Beliliou me ng mlo Dilidechuu e mlo er a Ngibtal er a Ngiwal me ng mlo Dirrachedebsungel (see meduuribtal) e mlo er a Ngerchebukl me ng mlo Dirrabkau.

Ngika el Dirrabkau a dimlak a ngelekel. A ta er a klebesei e ng mlo omus a such e metik er a ngais me ng kildmeklii e nguu el me er a blil me ng medechel el leko ngodimel. Ngika el mechas a ulebes er tia el ngais me ng medechel. Tia el ngais a ulemeu el ngalek el sechal me ngika el mechas a milngiklii el Ngiselacheos.

Tiakid er a lengar er a Ngerchebukl e a rechad er a Ngerchebukl a mlo melai er a redil er a Eanged e metom el dimlak el lenguu me te ngmai a buuk e mechit a medal a Temedokl el mengkar er a siseball er a Eanged. Tia a mlo uchul e a rechad er a Eanged a di diak lodengterir a rechad e te me soiseb er a Eanged. Tirka el chad er a Eanged a mlo ko er a rrau a rengrir e a lebo lesa Temedokl e ng diak a medal. Te ngoura a cheluchouch e merema el osiik er a medal a Temedokl. A le kirel a Ulechong e ng obuu a cheluchouch me te mocha medengei el kmo a remlo er a delengerenger a ngar er tia me te mocha er a Ngerchebukl. A lomes er a blai a Dirrabkau a ngar er ngii e ngar er ngii a chat me te ngmai a odimir el ngikel el lullengit er a remla er a chei el mo e dmue er ngii el mechas el kmo, "Chedil mdul aika el odimam me a kimei e kimngai."

Te merael e ngika el mechas a merakl a kukau e tmiud e ngmai aika el ngikel el locha er a chelsel e mekesiu e smaur e smuk er a oruikl e mechei. E tir a merema tirka el chad er a Eanged me ng ngmai el mesterir. Te ngmai el merael el mocha er a melengel a rael e mocha omengur. A lekedekedii a oruikl e ng di kukau e diak a ngikel me ng kmal ngilasech a rengrir. Ng di lebo lekedekedii a kukau e a ngikel a ngar er a chelsel e kmal ungil marek me ng kmal mlo ungil a rengrir. Te mlo merek el omengur e liluut el mo subedii a Dirrabkau el kmo, "A lemei a Ngiselacheos e ke dmu er ngii me ng soktii a olechutel e le ng mo er ngii a ieleb el blals e le rechad er a Ngerchebukl a ngilai a medal a Temedokl. A lebo er ngii a ieleb e kau me a ngelekem a mo er a olechutel me ng diak komad."

A lemerema a Ngiselacheos a delal a dula er ngii er aika el tekingir a rechad er a Eanged me ng mocha soktii a olechutel. A lebocha lemerek a olechutel e ngii a mlochu er ngii a ieleb me ngika el mechas me a ngelekel er a Ngiselacheos a mlo ngmasech er a olechutel e mlo er a Ngeruach el rois er a Ngeremlengui. Ng mocha chereches me te metongakl er tia el rois. Ngika el mechas a mlad e a rechad a mle metengel e miltik er ngii me te liluut el rullii me ng mlo chad mesei a uchul me ng mlo Milad a ngklel.

A Milad a mlo omechell me ng milchellii a Imeungs, Melekeok, Imeliik me a Oreor. A Ngebei er a Ngarchelong a rechedel a Milad. A Imeliik a mle redil e tirke el teru a mle sechal. A Ngerkeai er a Imeliik a mechellii a Ngercheluuk er a Ngiwal. A Ngeremlengui a ketengel a Milad me ng di ulebang. A Melekeok a kmal mle tekeok me ng dilebkii el mlo cheroid e a Imeliik a redil me ng di milecherei er a bita er ngii. A Oreor a kmal mle sureor me ng dirrek el dilebkii el mlo cheroid.

Tiakid el taem e te mla er ngii a rengelekel a Chuab me a rengelekel a Lild me aike el beluu el mla er a Eanged el mei. Aike el beluu el ngelekel a Chuab a Ngerchol er a Beliliou me a Ngermid er a Oreor me a Ngerusar er a Irrai me a Imul er a Imeliik me a Ngersuul er a Ngchesar me a Ngeruikl er a Ngchesar me a Ngellau er a Ngiwal me a Ulimang er a Ngaraard. Aikakid el kleai el beluu a ngelekel a Chuab.

A rengelekel a Lild a Chelab er a Ngaraard me a Ngchesar me a Irrai.
 Tiang el Lild a mla er a Ngeremengelong er a Chelab.
 A beluu el mla er a Eanged el mei a Ngersois er a Ngatpang me a
 Ngesebei er a Ngardmau me a Ngetmel er a Ngarchelong me a Ngerames
 er a Melekeok.

A Ngersois me a Ngesebei me a Ngetmel a leko ng ngar er ngii a bad el
 kerreel el ua ekil el leko aika el beluu a lullab a rechelid el olimoim el me
 er a eou.

Blingelex a Beluu er a Belau er a Irechar

Bitax el Eanged

- | | |
|-----------------|---------------|
| 1. Oreor | 4. Mengellang |
| 2. Ngeremlengui | 5. Beliliou |
| 3. Ngebuked | 6. Ngeaur |

Bitax el Eanged

- | | |
|-------------|----------------------|
| 1. Melekeok | 5. Desbedallechelong |
| 2. Ngersuul | 6. Ngerdmau |
| 3. Ngawal | 7. Ngcheangel |
| 4. Chelab | |

Aike el beluu el di mla er delongelel

- | | |
|-------------|--------------|
| 1. Irrai | 4. Imeliik |
| 2. Ngatpang | 5. Chol |
| 3. Ollei | 6. Ngkeklaui |

Blingelex a Beluu er a Belau er a chelecha el taem

Bitax el Eanged

Ngklel a beluu

1. Oreor
2. Irrai
3. Ngeremlengui

Ngklir a remerreder

- Ibedul
- Ngiraked
- Ngirturong

4. Imeliik	Rengulbai
5. Ngetbang	Rekemesik
6. Ngerdmau	Beouch
7. Beliliou	Obak
8. Ngeaur	Ucherbelau/Ucherremasech

Bitá el Eanged

1. Ngcheangel	Rdechor
2. Ngerchelong	Uorchetei
3. Ngeraard	Madrangebuket
4. Ngiwal	Uong
5. Melekeok	Reklai
6. Ngchesar	Ngirakebou

SKEL A CHEBECHIIL ER A IRECHAR

A irechar e a bo el soad el mo bechiil e kede mo katekoi kid me a redil el soad el mo bechil e didu el mesubed er a redemad me a redelad. A lecheterir a ngii di el bita e ng diak el sebeched el mo kaubuch. E le chedam me a chedil a osiik er a ungil el rasech el ngii a mo bechil a ngelekir. A lsekum me ng ungil er tir el erebita e kede mocha sebeched el mo kaubuch. A bo dekaubuch e a sechal a mo tmuu er a blil ngike el redil el bo lebechil. Se el lebo ltuu er a blil a redil e ng mo nguu a klou el chad el meduch el mo olsiseb er ngii er a blai. Tia a belkul a mo kesai a chelsang er se el blai me ng mo diak el sa el mengoit a udoud e le ng mla mo chesmachel er se el blai. A irechar e ng dimlak a merengel el chebechiil. Ng dimlak a klou el ungil klebesei se el lebo lebechiil a rechad.

Iseikid e ng mocha chebechiil me te ngar er a blil a redil e a demal a redil a remuul a kall el ngederel a ngelekel e mo ngoderterir er a blil a sechal. Se el loruul aika el kall el ngederel a ngelekir e ng ngar er ngii a meduch el melemosem a telechull el mo melemosem aika el telechull. E le lsekum me ng ungil a semesemel a telechull e a udoud a mereched el me soiseb er a demal a redil.

Se el lebo lemangader ngika el redil e ngii a mocha **buchelsechal** er a blil ngika el sechal. Me ng ngar er a blil a sechal el mo meketeket e a demal a sechal a mochu melecha er a ongraol er ngika el demal a redil. A demal a redil a remuul a kall el ngederel a delobech e ngmai a kall me a delobech el mo msa demal a sechal. Tia el delobech el lebo lolai er ngii a

ongraol el kirel el orul ngika el ngeleked el sechal e le tirka el teru el kaubuch a didu el sorir el kaubuch. E a chimo el kluk a ouerukem a teblo el delobech me se el ongraol el dolai er ngii a orul a sechal e se el medechel a orul a redil. Isei e a demal a sechal a mochu melecha er a orul a ngelekel el kluk. A lebo lolecha er a orul a ngelekel e a demal a redil a remuul a betok el kall el kelir a remle melecha er a orau. Chelecha el taem e a ongraol a mla mo diak. E ng di orau a dirk ngar er ngii. A Kluk el udoud er a Belau a kmal mla mo mekesai e di kesai el chad a olab. Me a orau er a chelecha el taem a oumesingd el di udoud er a Merikel me a lechub e ng udoud er a Merikel me a Kluk.

A urrerel a sechal el kirel a redil a belduchel me a utiichet me a ukerael me a omesiungel a delengcheklir. Se el lebo lomechar a demal a bechid e kede mo melecha a beldechelel a bechid e a bo lomechar a oktemelel a bechid e a ledu er kid a demal a bechid el kmo ko mo omelduchel e kede mo e a lak e ng diak. Se el lebo er a ocheraol a demal a bechid e kede mo ometiich er a til. Se el lemad a chad er a blil a bechid e kede mo osiik er a ukorolel a bechid.

A ukerael, tirke el redil er se el blai el mlad a chad er ngii a rokui el mo omekerael el merous aike el ukorolir el ulsiik a rebecherir el merous er tirke el redil el ngar er a kemeldiil el rokui.

Ngika el redil a lsekum me ng ungil el bechiil e ng mo sebechel el nguu a merengel. A mur a kot el ngar er a bab el omeruul er a chebechiil er kid a rechad er a Belau er a irechar me ng kesai el redil el kmal el ungil el bechiil a ngmai a merengir er a rebecherir. Tiaikid a roel a kekerei el chad me a kekerei el redil a lebo el kaubuch.

A rubak a bo lebechiil me bo ltuu er a blil a mechas el mo bechiil e ng omoket er a udoud el kldait el bsengel e mo bechiil. A omeruul er a uriur er a chelebechielir a di ua omeruul er a chebechiil er a remekekerei el chad. E ng di ngklel a rubak er se el blil a bechil a **uadam**, ng diak el chesmachel el ua remekekerei el chad.

ROLEL A KLDIULL EL MO LMUUT ER A CHEROLL

Se el de bo dodengelii a redil el kmo ng dioll er a keketengel, e ng mo chelsimer. A uchul e ng mo chelsimer a meruul er a delal a ngalek me lak lora el mes a betok el delengerenger me lebo lechelutel a ngalek el ngar er a delel. A demal a redil el dioll a mo mak a kerreomel er a bek el bedengel a kall el kelel ngika el dioll. A kerreomel a ngerachel el lenguu a demal a redil el dioll el msa ta er a chad el mo oungerachel er ngii el osiik a kall. Ng ngar er ngii a kerreomel er a ngikel, me a kerreomel er a

belochel, me a dirrek el kerreomel er a kuk bebil er a kall. A uchul e kede omak a kerreomel a kldiull er a irechar a beluu el kodall, me a tang, a meruul er a dioll me lak lengibes a kall e le ng mo ngemokel a ngelekel a lemechell.

A ede el bilel a redil e a oktemelel a redil mo kobsii a udoud er a chiklel el omebael. Tia el omebael a belkul a meruul er a ngalek el ngar er a diil el kmo, a lebeob e ng mo cherrungel el chad el diak el ultechei.

A elolem el bilel e ng mo er ngii a buuldiil. Seikid e a rechedal a sechal a mo olab a udoud el mo er a blil ngika el dioll. Aika el udoud a kleuang: 1. Ngar er ngii a Kluk el mo buuldiil. Tia a kirel el omuu er a delel a dioll. 2. Ng dirrek el ngar er ngii a Kldait el mo osumechulitech. Tia a belkul a kmo, se el lebo el belsechal a cheroll me lobuu a bedakl e lak lechetituokel a ngalek el me tuobed. 3. Ngar er ngii a eru el kldait el dik er a bitang me a bitang. Aika el udoud a melik er a ngalek er a chelsel a diil me lak lomteuitech me lebo lalterkokl a rengul a ngalek a lemechell. Aika el udoud a lomoket a rechedal a sechal el lebo losuk a oktemelel me a ruktemaol er a blil ngika el dioll el redil.

A dioll er a ketengel el redil a delsongel beluu me a bngel a delel a ulterkokl el mo er a oktemelel. A belkul a delsongel beluu, a irechar e a redil se el lebo el belsechel a cheroll e a reourot er se el blai a mo nguu a lild el mo desengii a delel a dioll e otebedii a ngalek. (sensei,-- mousbech er a cheldechedechal a Mengidatbrutkoel el smodii tiang). Me a belkul a delsongel el beluu, a dioll er a ketengel el redil a mo er a kmal belual me a blil e te dosengii a delel e otebedii a ngelekel.

A REDIL EL MLECHELL ER A KETENGEL

A redil el mlechell er a ketengel a mo measurech. A omesurech er a mlechell er a ketengel a ukeruul el mo er a bedengel a mlechell el redil e dirrek el meruul er a bul a bedengel a redil el mo ungu. Isei a uchul e te osiik aike el ungu a bul el emull el mo er a osurech. A ildisel a sils el lebo losurech a mlechell a oltirakl a ildisel a sils er se el blil. A bek el kebliil a kakerous ildisel a sils el losurech er ngii. Se el lebo losurech ngika el meduch el measurech er a mlechell e ng mo mesisiich a bedengel mlechell e ungu a bul. A bo el merek a omesurech e a rechedal a redil a mo msa udoud me a toluk el omeksullel a measurech.

Se el lebo er ngii a omesurech e ng ruoll a kekere el blai el lebo er ngii a mlechell e measurech e diak di lecholt er a rebetok el chad e le ng ngar er ngii a teletael el loltirakl er ngii a measurech. Se el lebo er a ulebongel er a omesurech e ng mo er ngii a omengat. A omengat a

orokiolel a omesurech me te mengat er a mlechell el meruul er ngii me a lebo er a sils e ng diak lebo lechetelaol, me a tang a meruul a bul ngika el mlechell el mo ungil.

Se el lebocha er ngii a omengat, e ng meruul a bliukel el lebo tuu er ngii a mekeald el kar. Tia el bliukel a lerellii me ng diak a chat el tuobed er ngii. Tiaikid e te nguu a mlechell el otungii er a chelsel e osiseb aike el ungil a bul el kar er a chelsel el mo meruul er a mlechell el mo ungil a bul a bedengel. Ng di ngike el kmal chedal a mlechell el redil a obengkel ngika el mlechell el ngar er a chelsel a bliukel el oba belsechel e ng me tuobed er a bliukel.

Ngar er ngii a eru el bedengel a omengat. A lsekum a redi a bechiil e ng mo er ngii a omengat el mera el omengat e a lsekum me ng mesobil e ng di omengat el ralm.

A lsekum me ng di omengat el ralm e a rechedal a sechal a di olab a klokkel a ngalek el mo er a blil ngika el mlechell el redil e a mlechell a diak lebo letobed. Tiaikid a mle roel a omengat er a irechar.

Se el lemera el omengat e a demal a sechal a mo mengabs er a udoud er a chikl el mlechell el dekedekel a chiukl el belkul a kmo, a demal a ngar er ngii a ududel el sebechel el mo er a ngelekel a lebo lekedung. A rechedal a sechal me a redil a didu el mo er a omengat e le tia a klou el deureng e le ng mla me ta er a chad me a delal a ngalek me ng mesisiich a bedengel. Isei a uchul e ng mo tuobed a mlechell e te omes er ngii a rechedal a sechal me a rebetok el chad. Seikid el omengat e a rdelal a sechal a mo measurech a ochil a mlechell e ng di diak a sechal el mo measurech a uach. Te di redil a mo measurech a uach el chedal a sechal.

Chelecha el taem e a lsekum me ng mera el omengat e a rechedal a sechal a olab a klalo me a udoud el mo er a blil ngika el mlechell. Aika el udoud a doleker el kmo ng sengk el mo er a ngalek. A sengk er a chelecha el bla bo lak a buuldiil a lebebil er a taem e ng masuk a demal a mlechell e a lebebil e ng masuk a oktemelel ngika el mlechell. A omengat el ralm a di osisiu. E ng di chelecha e a redil a di sebechel el mesobil e a lemechell e ng mo tuobed. E ng di te di chedal ngika el redil a di tir el mo mengabs er a dekedekel a chiukl.

KODELLIR A REDI CHAD

Se el lemad a chad e ng mo er ngii a subed er a kodall. Ngike el kmal chedal a mlad el chad a kirel el mesubed er a rechad. A rechad el sbadel a retelungalek me a rechad er a kebliil me a keblillel er a demal

me a delal a mlad. A merreder er a keblillel a delal a mlad a blechoel el oltobed er a subed.

A lemad a chad er a irechar e ng kired el melecholb er ngii. Ng di ngike el redil el kmal chedal a mlad a melecholb er ngii. E le bebil er a taem e a mlad el chad a mengemochem me a lechub e ng chemei. Sei a uchul e ng di ngike el kmal chedal a chad a melecholb er ngii. A redil er a obliil me a lechub a bechil a mlad a diak el sebechel el melecholb er a mlad e le ng mo uchul a mekngit el chais el me er kid. A mlad a kired el tochelbii er a uchei er a bo lekloi er a bluuldang e le rechad a mekngit a rengrir me ng sorir el mo omes er a mlad e lmangel me a rebebil a lmangel el mo melungel er a medal a mlad.

Se el deketmeklii ngika el mlad el chad el mo ungil e ng mo kloii er a bluuldan er a blai, e ngii a mocha subed el lebo lomes er ngii a rechad. A bluuldang a se el tuangel er a belngel a blai. Tirke el chedal a mlad a ngar er a sar. A sar a sar er a iars. Se el lemad a chad me lebo lekloi er a bluuldang er a blai e te merekii a iars er a mlai er se el tuangel er a bluuldang me ng diak a deribek me a lechub a dichel a sils el mo er a mlad el chad. Tirke el mechas el liliuekl er a mlad a dengchokl er a eungel a sar er a iars. Sei a uchul me te ngar er a sar.

A lsekum a mlad el chad a sechal e ng ngar er ngii a lild el ulsirs er kboub el cheleolel a mlad. Tia el lild el cheleolel ngika el sechal el mlad a belkul a orrekim a merreder er a did el lokiu ngii a remlad el mo imuul er a belurir a redeleb. Se el lebo a delebengel a sechal e ng nguu se el cheleolel el lild el lorrael er ngii el mo imuul er a did. A lsekum a mlad a redil e bechiil e a rechedal a bechil a mo melecha dillel. A lemesobil e te di rengalek el redil me a remechas er se el blai a mo omoket a dillel me te smuk a ruktemaol er se el blai. Aikakid el dillel a redil el udoud se el lebo a delebengel a redil er a eanged e ng ngmai aika el udoud el msa a orrekim el cheral a did e mo imuul.

Chelecha e a mlad el chad a kloii er a bluuldang e a remechas el ngar er a chelsel a blai a mengelleloi. A omerous el ukerael a ngar er ngii. Aika el ukerael a kall me a lechub eng ilaot el lulsiik tirke el becherir a redil er se el blai el mlad a chad er ngii. Aikaikid el ukerael a lolab tirke el redil er se el blai el merous er tirke el ngar er a kemeldiil el redil el rokui e a resechal a diak lebo er tir a ukerael.

A lsekum a chad el mlad a telechull er a dui e ng siokel a reteru el meduch el melai a dui el chad. Se el lechelngii a beldokel el mo dechor er a odesongel e a ta er tirke el meduch el melai er a dui a nguu se el dui el

loba el mo tuuebokl er a eungel a beldokel el mo msa ngike el ta el ngar er a bluuldang e ng mochu medakl a beldokel.

Se el lebo lolakl er a chad e a lsekum a mlad el chad a klou a rolel el mo er se el blai e ng mo medakl er a uchul a orengodel er a odesongel er se el blai. A lsekum me ng kekere a rolel el mo er se el blai e ng mo medakl er a rsel a orengodel. A irechar e ng dimlak a olekull me a remlad el chad a di mo medakl er a odesongel er a blai. A olekull a mlo er ngii er se el taem er a Siabal.

KLOMENGEIUNG

A klomengeiung a mo merek a omelakl e a bo el kukuk er a kebesengei e ng soiseb a klomengeiung. A remo mengeiung el redil a tirke el meklou el redil el chedal a mlad el chad. Ngike el kot el klou er tirka el mengeiung a mo oba a bar. Ngike el oba a bar a leko ng olab a chesengel a mlad me ngikeikid a mo kot el meoud el tuobed er tirke el mengeiung el rokui.

Se el lesiseb a klomengeiung e ng ede (3) el klebesei e tir a mo osiik a ungil el bung e rulii a sis e a bo el klebesei e tir a mo olturk er a sis el osiik er a uchul a kodellel ngika el mlad. Tirke el mo mengedecheduch er a sis a tirke el meklou el redil el chedal a chad el mlad el kauderta er tir el mo oba a sis e mo omasech aike el lomdasu e ng uchul a rakt el kirir. A lsekum a ta er tir a dillii se el uchul a rakt me ng mlad ngika el chad e a sis a mo meloik. E a lsekum ng dimlak el delii a uchul a kodellel ngika el chad e ng diak lebo loloik a sis. A bo el tutau e te tuobed a rebibil er tirke el mengeiung le diak el sa el meklou a rolir el mo er ngika el mlad.

A omengades a etiu (9) el klebesei e ng omengades er a debellel ngika el mlad. A remo mengades el chad a tirke el chedal ngika el chad el mlad. A lsekum a mlad a sechal e ngar er ngii a resechelil e sorir el mo mengades er a debellel ngika el mlad e te mong, e kid a meruul a kelir. Se el bo lemerek a omengades e te tuobed a rebibil er tirke el mengeiung el mechas.

Chelechang e ng mo merek a omengades e ng euid (7) el klebesei e ng ballechad. Tia el ballechad a dirrek el tebedall er a remengeiung. A belkul a kmo a rengul a delebengel a mlad a dirk chemau a berul er a lechad.

Uriur er a ballechad e ng dirrek el euid (7) el klebesei e ng ballechelid. Tia a dirrek el tebedall er a remengeiung. A belkul a kmo a rengul a delebengel a mlad a mla mo chemau a berul er a klechelid.

Uriur er a ballechelid e ng kuk euid (7) el klebesei e ng toudechad. Tia a dirrek el tebedall er a remengeiung. A belkul tia a rengul a delebengel a mlad a dirk teluchakl el bedul a klechad. A kot el uriur er a tebedall er a remengeiung a toudechelid. Tia a dirrek el euid (7) el klebesei er a uriur er a toudechad e ng mo er ngii a toudechelid. Tia a belkul a kmo, a rengul a delebengel a mlad el chad a mla touchakl el mo bedul a rechelid.

Ngike el oba a bar el mechas a tuobed er tiang me a lechub e ngii di el ta er aika el edei el reuikl: ballechad, ballechelid, me a toudechad, alsekum me ng di ngii ku el tang el mengeiung.

CHELDECHEDUCH ER A KODALL

Chelechang e ng mo merek a klomengeiung e ng mo er ngii a cheldecheduch. A cheldecheduch a lsekum a chad el mlad a bechiil e ng mo er ngii a cheldecheduch. Ng di a lsekem e ng di mle mesobil e ng diak a cheldecheduch. Me a lebocha er ngii a cheldecheduch e ngike el chedal a ldemal me a lechub e ng ngike el merreder er a kebliillel a sechal a mesubed er a rechad er se el kebliil er a cheldecheduch. Ng dirrek el okdemelel a sechal a mesubed er a rechederir me te me er a cheldecheduch. A belsechel a cheldechedch a loba tirka el chedal a sechal. Ngika el chedal a sechal a mesubed er a rechedal el rokui er a belsechel a cheldecheduch e te mo kldibel e osiik er a remo kirel a oruikl. Me se el lebocha el moterkokl a ildisel a oruikl e ngike el oungerachel er a cheldecheduch a mesubed er a chedal a redil el kmo ng tela el oruikl a ruoll.

Chelechang a udoud el otebadel a udoud el mo chelebechiil me a techel a oruikl. A lsekum a mlad a redil e ng diak a techel a otungel e ng di ngar er ngii a chelebechiil me a techel a oruikl. E a lsekum e ng mlad a sechal e ng ngar er ngii el edei. Aika a techel a otungel me a techel a oruikl el udoud e lebo lomokete a rechedal a sechal el mo er a rechedal a redil. Se el chelebechiil a uaia lududel a ngalek e le chelebechiil me a ududel a ngalek a di mle ta er a irechar.

A ngerechelir a rechedal a redil er a cheldecheduch a meruul a kall. A okdemelel a redil a meruul a kelel a chelebechiil. A rukdemaol er a blil a redil a meruul a kelel a oruikl. Me se lebo losuk a udoud e a

okdemelel a redil a mo sukur a chelebechiil e a rukdemaol er a blil a redil a mo mesuk er a techel a oruikl.

A omeruul el kall er a chelechang el taem a mla mo diak el sa el ulterkokl e le ng mla mo diak a oruikl me ng dirrek el mla mo diak a techel a oruikl.

A udoud el bekatel er a chelechang el taem a ngar er ngii a ududir a rengalek me a chelebechiil. A ududir a rengalek a bo losuk er ngii a okdemelir a rengalek e a chelebechiil a losuk er ngii a demal a redil.

KODELLIR A REMETEET

A lemad ngike el kot el rubak er a beluu e a remechas er se el blai a subedii a ongeru el rubak me ng subedeterir tirke el rubak me te mo kldiber er se el blirir e oderchii a chad el mo melebusech el euid (7) el olengemetel a rengul ngika el rubak el medei e dirrek el mesubed er a beluu el rokir el kmo a rubak a medei. Tiang a mle tekoi er a irechar er a ledirk lecheldull a beluu me a klobak a kmal dirk mle mesisiich.

Chelechang el taem e ng di ngike el kmal chedal a mlad a oltobed er a subed el mo er tirke el chad er a kebliil me a rubak er se el beluu me a rubekul a Belau.

A blekeradel er a kemeldilir a remeteet er a irechar a mle telkib el ngodech er a chelechang. Ng mle kuoll el diak a kmal cherrodech me a rechad a mlengull a rokui el blekerdelel a kemeldiil. A bebil er a blekerdelel a kemeldiil a di osisiu ngii me a redi chad. Chelecha el taem e a kemeldilir a rubak a di kmeed el di kaisisiu ngii me a kemeldilir a redi chad.

Se el lebo el medakl ngika el rubak e a rubak er se el beluu a kldibel er se el blirir e oldurech el mo oker er a ruurrot er se el blai er a mo sechelirir. A ruurot a mo olisech er a mo omteche er ngika el mlad el rubak e a lsekum te dillii a sorir a rubak el ngar er a bai e te kongei. E ng di lsekum me ng diak el sorir e ng diak lekengei el di mereko lebetik er a sorir e te kongei.

Se el sis e bo el tutau e te nguu se el sis el lulelturk er ngii, e ng mo er ngii a debusech e ng mengerd se el sis el taor. A lsekum me ng mle teruich el lolebusech e ng teruich (10) el klebesei el taor el diak a cherrodech er a beluu. A lsekum ngar er ngii a chad el mengerodech e a rubak a melsii ngike el chad. A lemad a ongeru (2) me a ongedei (3) me a ongeua (4) el rubak e ng di mo taor er a aike el kebliil er tir el dirrek el teruich (10) el klebesei.

Se el bocha el moterkokl a rubak e ng ruoll a kerritakl. A kerritakl a loruul er ngii a oktemelel ngike el redil el bechil ngike el redil el mo omtechei er ngika el mlad el rubak er se el beluu. A rubak er se el beluu a ngar er a bai e ngii a meruul a kelir tirka el rubak me a ruurrot er se el blai el teruich (10) el klebesei. A udoud el mo meruul er a kerritakl a lomoket er ngii a ta er a ruurrot er se el blai. A mo mesuk er a udoud er a kerritakl a oktemelel a bechil ngike el beches el mo rubak el ngii a meruul er a kerritakl. Tia el omeruul er a kerritakl a di omeruul se el lemad a Reklai er a Melekeok.

A beches el mo rubak a mo chelsimer el ta el (1) buil e ngike el ourrot er se el blai a olsisechakl er ngii a kelulul a beluu.

Se el bo lemerek ngika el rubak el chelsimer me bo letobed el mo er a bai e a ruurrot er se el blai a mo omoket a udoud el mo er ngii el belkul a kmo, ng mocha merreder er a beluu me ng mo diak longereker e le ng mo mechesa er a tekingel a beluu. Aikaiked el udoud a doleker el kmo techiau.

Se el bo el chelsimer ngika el rubak e ng ngar er ngii ngike el kirel el oba el mo er se el bai er a rubak. Me a lebo e ng mo tmuu er a bai el mo dengchokl er a eungel a kleangel. E tirke el rubak er se el beluu a nga er a bai el rokui. Ngike el uleba ngika el rubak el mong a subedeterir el kmo ngikakid a sechelimiu. Me ng di oisechii e lmuut el nguul el mo er a blai. Iseikid e ngii a mochu okedongall er se el dui el mle kirel el mo meluchel er ngii.

A kleangel se lemedasech a bai er se el beluu er tir a chousii a meolt e rulii el kmal mo klebokel e nguul el mo kobsii er a bebul se el kingellel ngike el merreder er a beluu. Tia el bai a birir a rebeldekel se el beluu. Se el lebo locheraol er se el bai e ngike el rubak a mo meluluuch er a rebeldekel se el beluu el omekngaltengat er se el ocheraol. Ise a uchul e ngike el beches el mo rubak a mo kiei er a eungel se el kleangel el belkul a mo nguul a dui er a rebeldekel se el beluu.

Ngike el beches el mo lbedul a mo melai er a dekedekel a btelul er a Beliliou. Me a beches el mo Reklai a mo olsarech er a teliakler a Ngcheangel.

CHUTEM ME A CHEI

A chutem er a Belau a ua tiakid a rolel, ng ngar er ngii a rois, ked, chereomel, ngeaol, omeklochel, dechel, omrekongel, mesei, lius, beluu me a beluu.

ROIS. A rois aike el mekididai el chereomel el oumesingd el di bad.

KED. A ked a dirrek e mekididai e ng di diak a meklou el kerrekar er ngii. Ng di chudel me a chitouch me a mekekerei el kerrekar a ngar er ngii.

CHEREOMEL. A chereomel aike el chutem el ngar er ngii a bek el bedengel a kerrekar me a besebes me a emull el dimlak a chad el melalem, ng di mle ngii el dubech.

NGEAOL. A ngeaol aike el chereomel e kede totem e ousers. Ea ike el ked el dousers a di doleker el kmo sers.

OMEKLOCHEL. A omeklochel aike el chutem el ngar er ngii a dechel me a omrekongel me a mesei.

DECHEL. A dechel aike el mle mesei e mla mechoit me ng diak a dait me a lechub e ng brak el dellomel er ngii me ng di chudel.

OMREKONGEL. A omrekongel a di uaia mesei e ng di kuk dellomel a brak er ngii.

MESEI. A mesei aike el chutem el blechoel el klou el ralm er ngii me ng medemedemk e dellomel a dait er ngii.

LIUS BELUU. A lius beluu aike el doker el kmo chereomel er a lius. Aika el lius beluu a ngar er ngii a bebil er a beluu el di mla er ngii a lius beluu er ngii me a bebil er a beluu a kuk mle er se el taem er a Siabal e a tekoi er a Amt er a Siabal a tilobed el kmo a bek el beluu er a Belau a mo melalem a lius el mo lius beluu me ng bek el beluu er a Belau a mlo melalem a lius. A uchul e ng lius beluu me aika el lius a lius er a beluu.

BELUU. A beluu aike el chutem el ngar er ngii a delengchokl er a rechad er ngii. Me ng ngar er ngii a chades me a blai me a bai me a diangel er ngii.

CHEI

Chelecha kede kuk mo er a chei. Me a chei a ngar er ngii a kebokeb, keburs, taoch, demetaoch, lalou, uet, lemau, kereker, chis dailechei, melekesokl, ngeraol, oreall, chiloil, chelemoll, me a daimechesengel.

KEBOKEB. A kebokeb se el ulebengelel a keburs me a klechutem.

KEBURS. A keburs se el ngar er ngii a kebokeb me a demetaoch me a taoch me a lalou e ngelengelotel a doraal er ngii e ngar er ngii a bek

el bedengel a kerrekar e diak el sebechel el dubech er aike el diak a daob er ngii.

TAOCH. A taoch a oumesingd el uriur er a omoachel me ng ko er a omoachel el merael er a chelsel a keburs. E ng di meklou e dmolech me ng sebechel a bilas me a mlai el merael er ngii. Me aika el taoch a mo er a beluu el ngar er ngii a delengchokl er ngii me a kuk bebil a di mo er a klechutem el mla er ngii a delengchokl er ngii er a irechar.

DEMETAOCH. A demetaoch aike el mekekere el taoch el diak lebo er a klechutem. Ng di mo er a chelsel a keburs me aike el mekekere el metucheklel a taoch.

LALOU. A lalou se el ulebengelel a kerrar er a keburs me a uet.

UET. A uet a delongelel a lalou me a kereker. Se el lebo lemeched a chei e ng diak lebo el meched ng di dmolech e betok mekemanget el char er ngii. A uet a di ngar er ngii er aike el beluu el ngar er ngii a keburs er ngii. Aike el ouchelechol el beluu a diak a uet er ngii.

LEMAU. A lemau aike el mekeke el taoch el ngar er a belngel a kereker me a lechub e ngar er a chelsel a uet. A uchul e ng lemau a diak el sa el dmolech e ng di mellemau a domes er ngii.

KEREKER. A kereker se el delongelel a uet me a dailechei el se el bo el meched a chei e ng mo meched el mo diak a daob er ngii.

CHIS. A chis aike el ngar er a belngel a kereker el se el bo el meched a chei e ngii a diak lebo el meched e di ngar er ngii a daob er ngii. A uchul e kede kmo ng chis a uaia deremechis.

DAILECHEI. A dailechei a se el delongelel a kereker me a chelemoll el bo el meched a chei e ng diak bo el meched. Aike el ouchelechol el beluu a dailechei er ngii a di meched el mo er a oreall me ng diak a ngeraol er ngii e ngar er ngii a bad me a merangd me kede ousbech el ngar er a chei er ngii. E aike el oukeburs a dailechei er ngii a toachel el mo er a ngeraol.

MELEKESOKL. A melekesokl aike el meched el ngar er a delongelel a kereker me a chelemoll.

NGERAOL. A ngeraol aike el beluu el toachel a dailechei er ngii a ngar er ngii se el tkul a meched el ngar er a oreall me a dailechei, iseikid a ngeraol.

OREALL. A oreall se el bo el meched a chei e se el kot el mo meched er a chelemoll el ngar er ngii aike el meklou el bad el me chuob iseikid a oreall.

CHILOIL. A chiloil aike el meklou el bad el ngar er a oreall.

CHELMOLL. A chelmoll a ikrel a oreall el omodees a daob er ngii.

DAIMECHESENGEL. A daimechesengel a delongelel a chelmoll me a uchul a eanged.

OLIOCHEL ER A CHUTEM

Chelecha e kede kuk mo imuul el mo er a oliochel er a chutem. A oliochel er a chutem er a irechar a mle ked, bad, kerrekar, teletelel a chutem, dellomel, cheliuis, euatel, omoachel me a lechub e ng diong. Chelecha el taem e kede ousbech a **smengt**.

KED. Se er a irechar e ng dimlak a omeluk el chutem me ng dimlak a omelalem el smengt. A chad a sebechel el ouchutem el mo tmurk er a ked, e se el ked a mocha oliochel er ngii me a ta er a chad.

BAD. A rebebil er a rechad uluusbech a bad. Aika el bad a meklou el ngai el mo locha er a ulebengelel a ta me a ta er a rechad el oliochel.

KERREKAR. A rebebil a ousbech a kerrekar. Te uluusbech el melalem aike el mo meklou el kerrekar el ua ukall me a lechub e ng miich me a lechub e ngii di el kerrekar el dechor er a oliochel er a chutem el omii er a chetemel a ta me a ta er a rechad.

TELETELEL A CHUTEM. A kuk bebil er a rechad ousbech er a teletelel a chutem el oliochel. Se el teletelel a chutem a loltirakl er ngii me aike el tkul a lousbech el oliochel.

DELLOMEL. A rebebil er a rechad a ousbech el melalem a tuu me a lechub a meduu me a lechub a lius el oliochel er a chutem.

EUATEL. A rebebil er rechad a uluusbech a euatel. A irechar e aike el chades er a beluu a ngar er ngii aike el siseball el mo er a chelsel a beluu el cheldukl er a bad el mekididai er a bita me a bita el chades, aikeikid a euatel. A uchul me ng euatel a lengar er ngii a mekemad el me er a beluu e te oueuatel er ngii a rechad er se el beluu e oumekemad er a recheraro. A euatel el tekoi a belkul a omerotel. Se el dengar er ngii e omart er kid er a cheraro.

OMOACHEL ME A DIONG. A omoachel me a diong a dirrek el oliochel er a chutem. A bita el diong me a lechub e ng omoachel a omii er a chetemel a ta me a ta er a rechad.

SMENGT. A smengt a mlo er ngii er se er a lemei a rechad er a Siabal me blo loluk a chutem er a Belau. Seikid e kid a mlochu melalem a smengt el oliochel er a chutem el me lmuut er a chelechang.

BLINGELEL A CHUTEM ER A IRECHAR

A blinglel a chutem er a irechar a mla er ngii a chutem buai, chutem beluu, chutem er a kebliil, tungel me chetemir a redersta el chad.

CHUTEM BUAI. A irechar e ng mla er ngii a chutem buai. A chutem buai aike el chutem el klalo er a chimo el beluu. Aika el chutem a sebecherir a rebek el chad el ousbech. A merreder er a chutem buai a merreder er a beluu. Ngika a di ngar er ngii a klisichel a lsekum a ta er a rechad er a ngodech el beluu a soiseb er se el oliochel er a chutem buai, e ng ngar er ngii a klisichel a merreder er a beluu el lodikii. E ng di a lsekum te chad er se el beluu e ng di subed. A chutem buai se el oliochel er a beluu el mo lmuut er se el ngar er ngii a chutem beluu me a chutem er a kebliil me a chetemir a rechad. Aika el chutem a mlengai er a mekemad me a mlokoll me a mlengai er a ulecheracheb me a mlongit er a ulecheracheb me a mlongit me aike el mlo tiklel se el beluu. A uchul me ng chutem buai a ngar er a buai er a rechad er a beluu. Me ng sebecherir a rechad er se el beluu el diak losubed e mo melobeche a kerrekar er a chelsel aika el chutem me ng klokliir. E ng di nguu a chutem el mo kloklel a bedengel a diak el sebechel.

A mlokoll el chutem a lsekum a beluu a mlengai er a mekemad me te chiliis a rechad er ngii el mo er a chimo er a beluu e ngike el merreder er se el beluu el chiliis a rechad er ngii a mo meketii a udoud el mo er se el beluu el ua lomechar er a chutem el le bo lekiei er ngii tirke el chiliis el chad. Me a merreder er tia el beluu a otebedii a chutem el mesterir. Tiakid el chutem a doleker er ngii el kmo mlokoll el chutem.

Chelecha aike el chutem el mle tiklel a beluu a ua tiakid a rolel. A lsekum ngar er ngii a beluu el soal el mo oumekemad er a chimo er a beluu el soal melai er ngii e diak el sebechel e ng mo olengit er a bebil er a beluu el mo olengeseu er tir el oumekemad el nguu se el beluu. E ngike el merreder a mo omoket a udoud el tiklel aike el beluu el ullengeseu er ngii. E a lsekum me a chimo er aika el beluu a mo diak a tiklel a udoud e ng otobedii a chutem me a lechub e ng omerreder el msa se el beluu el mlo diak a tiklel el udoud me ng tiklel. A tiklel a uia lomelsullel a beluu el ulengeseu er kid er a mekemad.

A oliochel er a chutem buai a mloterkokl el okiu a siukang, me a mekemad mea cheldecheduch er a omerael er a uchelel a beluu. Me aika el dochel a di oltirakl aike el di da oliochel er ngii er a uchei er a lemengai.

CHUTEM BELUU. A chutem beluu a rael, klubed, mekedecheraol bai, diangel, lius beluu, me a aike el kerengel el beluu er a irechar e mla mechoit el mo diak a rechad er ngii. A kerengel aike el mekekere el beluu el mesiungel se el klou el beluu.

A chutem beluu a oumesingd el mle chetemir a derta el chad me a lechub e ng kebliil e a rechad er a beluu a ngilai el bo lousbech a beluu. Aika lullai a beluu el ousbech el mo rael, omekedecheraol er a bai, diangel, me a lechub e ng klubed. A lius beluu aike el chutem el dimlak a delengchokl er ngii e a beluu a mlo soal el ousbech me ng dualem a lius er ngii me ng lius beluu.

CHUTEM ER A KEBLIIL. A chutem er a kebliil a ua aike el bla desaod er a omesodel a kebliil el kmo ngike el chutem el blo lekerd er ngii tirke el chad el kot el mo dilbechii se el omesolel a blai er se el kebliil. A bebil er a chutem er a kebliil a mlengai er a omesiou me a lechub e ng mle chelebechiil me a dirrek a kuk di mlongit. Aike el mle chelebechiil a lsekum me ng dimlak el tobed er tirke el telungalek el ulsiseb e tir a mla nguemed e ng mo medechel el me lmuut er chelecha e ng mocha chutem er se el kebliil.

A merreder a chutem er a kebliil ngike el merreder er a kebliil. Ngika el merreder a lsekum me ng ochell e ng sebechel lotobed a chutem el mo er a rechad. E ng di a lsekum me ng ulechell e ng diak. Ng kirel, a lsekum me ng soal el oltobed er a chutem e ng melai er a turk er ngike el klou el ochell me a ruurrot er se el blai.

A blingelel a chutem er a kebliil a lounge Rachel a merreder er a kebliil. A lsekum ngar er ngii a ta er a rechad er a kebliil el soal el omekedechor er a blil e diak a chetemel e ng sebechel el olturk me a lechub e ng olengit er a merreder er a kebliil me lebsa ta er a chutem me lokedecherur a blil er ngii. Me ngika el chad a di kiei er a chutem e ng di diak el sebechel el choderderii el msa ngelekel me lebo el chetemel. Ng dirrek el ngar er ngii a bebil er a rechad er a kebliil el ngar er ngii a chetemir el klokkel a bedengir el kmo ng locha mle chelebechielir a rederrir me a lechub e ng chetemir er a redemerir. Me a ta er a ngerchelel a merreder er a kebliil a omes er a bek el chad er a kebliil er a delengcheklir me a techere beserir. A lengar er ngii a chad er a kebliil el ousbech er a telkib el chutem el mo sers me a lechub e ng mesei e ngar

er ngii a chutem er a kebliil el mededaes e ng sebecchel ngike el merreder el nguu el msa ngike el metacherbesul el chad me ng ousbech er ngii. Ng ngar er ngii a eru el meklou a ultutelel el chutem er a kebliil el diak el sebecchel el tuobed el mo er a rechad. A kot a omesolel a blai. A omesolel a blai el chutem se el chutem el dechor er ngii a uchul a delengchokl er se el kebliil. Ongeru a Ikul a dui. A Ikul a dui a mesei el di ua rolel a omesolel a blai. Se el mesei el kirel ngike el rubak el meluchel er a dui er se el kebliil.

Chelecha e ng ngar er ngii a chutem er a kebliil el ousbech a beluu. Aika el chutem a mlongoit er a rechad er a beluu me bo lousbech a beluu el mekedechor a bai, diangel me a lechub e ng mo rael. Me aika a ua lebla lebo el chutem er a beluu.

TUNGEL. A tungel a oreomel el chetemel a chelid, me ng diak a chad el merreder er ngii. Ng dirrek el chedaol el diak el sebecched el soiseber er a chelsel me a ka dolobech a kerrekar er a chelsel. A debo dedobech a kerrekar er a chelsel e kede mo smecher. A tungel a di ngike el mo meluchelchelid a mo oungerachel el ua longkar er tia el chutem. Aika el tungel a diak el sebecchel el tuobed el mo er a rechad el mo chetemir e le ng mekull.

CHETEMIR A REDERTA EL CHAD

A chutem el doleker el kmo chetemir a rederta el chad a chutem el klokkel a bedengel a chad. Aika el chutem a mlengai el mlochar, mlongit, ulsiungel, me a lechub e a demal me a delal a milsa a ngelekel me ng klokkel. Aikaikid el chutem a chetemel a bedengel a chad. Ng diak a ngodech el chad el merreder er a chetemel a bedengel a chad. Ng di ngike el chad el ouklalo er ngii, ngikei a merreder er a chutem. Ng sebecchel el oterur me a lechub e ng nguu el msa ngelekel me a lechub e ng otebedii el mo ulsiungel. A lsekum tia el chutem a mlo diak el tobed e ngika el chad el ouchutem er tia el chutem a mla mad e diak a ngelekel me a lechub a rebebil er ngii e ng sebecchel tia el chutem el mo medechel el mo chutem er a kebliil.

OIDEL A CHUTEM

Aika el chutem el bla desaod ng kuk milekera e moiuid el mo er a ta er a chad me a lechub e ng kebliil me a lechub e ng beluu.

A kot a chutem el mlengai er a mekemad. A beluu se el lebo loumekemad er a ta er a beluu e bo el mesisiich e te nguu a chetemel se el beluu. Ng dirrek aike el beluu el kuk mlo olengeseu er se el beluu el mlo mesisiich a mo er ngii a tiklir el chutem a lsekum me ng mlo diak a udoud el mo tiakl.

A ongeru a chutem er a kebliil a sebechel el moiul el mo er a ta er a kebliil, a lsekum a rechad er se el ta er a kebliil a mla nguemed.

A ongede a omeluchel. A lsekum a chad a mo diak a ududel e ng sebechel el otebedii a chutem el msa ngike el chad el meluchel el mo er ngii.

A ongeua a ulecheracheb. Ngar er ngii a bebil er a chutem el mlengai el mo er a ta er a rechad el okiu a ulecheracheb.

A ongeim mlochelochel. A mochelochel el chutem a lsekum a ta er a chad el ngar er iou el chad a rirellii a mekngit el omeruul el mor er a bechil a ngar er a bab el chad e ng meluked el oba udoud e a lak a udoud e ng sebechel a chutem.

A ongelolem a saker. A lsekum a sechal a mlo osiik er a bechil el ta er a sechal e mlo sechelil, e ngika el sechal el bechil ngika el redil a mo omals er ngike el sechal el mo sechelil a bechil. Me ngika el sechal el mlo sechelil a bechiil el redil a lsekum me ng diak el sebechel el ousaker el oba a udoud e ng ousaker el oba a chutem.

A ongeuid a chelebechiil. Ng ua aike el bla dosuub el kmo, se el lemad a bechiil el chad, e ng mo er ngii a cheldecheduch. Me a lebo er ngii a cheldecheduch e ng ngar er ngii a chelebechiil. Tia el chelebechiil a sebechel el udoud me a lechub e ng chutem.

A ongeai a omelemesumech. A lsekum a teru el kaubuuch el chad a mlo er ngii a telemall er a delongelir e a sechal a mlo uchul a telemellel a chelbechielir me te mocha merek el kaubuuch e a sechal a kirel el melemesumech er a redil. A lolemesumech e ng sebechel el ousbech a udoud me a lechub e ng chutem.

A ongetiu a klaitutechei. A klaitutechei el tekoi a locha di dodengelii el rokui. Se el bo el soad a klokkel a chad me a ta er a chad a mo soal a klokled e ng sebeched el kautitechei aika el klalo. Me a chutem me ng ua isei el sebeched el mengaitutechei. A leblo el soad a chutemel a ta er a rechad le ng kmeed er a chetemed e kau a kuk ngar er ngii a

chetemem el kmeed er ngika el chad e ng sebechemiu el mo katekoi e kaututechei aika el chetemiu. A lechum a ta er a chad a kuk betok a chetemel e diak a meklechel e a ta er a chad a betok a meklechel e mekesai a chetemel e ng sebecheiu el chadecheduch e kaututechei a chutem me a meselech.

A ongeteruich a oterul el chutem. A irechar e ng ngar er ngii aike el chutem el doleker el kmo ng mlokoll. A ulekoll el chutem a bla desodii. Aika el chutem er a chelechang el taem e kede kmo ng mlochar me a lechub e ng mloterau. A chutem er a Belau er se er a lekot el mei a rechad er a Ngebard e ng mla er ngii a mloterau el mo tirke el chad er a Ngebard el ua leble el kot el chard el mlei er a Belau a rechad er a Sebangiol. Te mlei er a Belau er se er a 1888 el mo lmuut er a 1899. Tirka a mle el omerk a tekingel a Rubak el Dios el mo er a rechad er a Belau. Te uluusbech a chutem el omekedechor a Ikelesia. Ng dirrek el mla er ngii a bebil er a chutem el mlengai el mlochar me a kuk di mlongit er a rechad er a Sebangiol. A chutem el mlengai er a rechad er a Sebangiol a di mle mekesai el di lulemekedechar a Ikelesia er tir er ngii.

A rungeru el chad er a Ngebard el mlei er a Belau a rechad er a Dois. Tirkang a mle er se er a 1899. Te mla er a Belau el mo lmuut er a 1914. Tiakid el taem er a Dois e a mloterau el chutem a mle oisab el betok.

A uriul er a rechad er a Dois e le mei a rechad er a Siabal e a mle moktek er tir a mlei el me kiei er a Belau. Ng kmal mle betok el chutem er a Belau a mlochar me a di mlengai el blo lousbech a rechad er a Siabal. Tirka el chad er a Siabal a mle er se er a uriur er a kot el mekemad er a beluulechad. Te mle er se er a 1914 e ngiluu a omerreder er aika el iungs er a rechad er a Dois e kiliei er a Belau el mo lmuut er a ulebengelel a ongeru el mekemad er a beluulechad er se er a 1945. Tiakid el taem el kiliei er a Belau e ng kmal mle betok el chutem a mlengai el mo klalo er a Amt er a Siabal. Se er a lebo lemerek a ongeru el mekemad me lemei a rechad er a Merikel e aike el chutem el mlengi er a rechad er a Siabal a mlouid el o er a Amt er a Trust Territory. Aika el chutem a bebil er ngii a mla moluut e a bebil a dirk merael a kerrekeriil er ngii el mo olterekokl er a remeral el louklalo aika el chutem.

OMERREDER

A omerreder a uldimukl er ngii a eru el tekoi. Ng ngar er ngii a klisiich me a ngerachel. A klisiich el tekoi a betok a belkul e ng di belkul el debo dousbech er ngii er tia el hong a llemalt.

A leua isei e a merreder el oba a klisiich a merreder el ngar er ngii a llemeltel el meruul a tekoi me a lechub e ng melib a ungil el omeruul el mo tirke el chad el ngar er a eungel. Tia el tekoi a kmo, **ng meruul a ungil el kirir tirke el chad el ngar er a eungel** e utebengall e le tiakid a uchetemel se el llemalt el oba a chad el merreder. A lsekum a merreder a di meruul aike el ungil er ngii e diak lomdasu er tirke el chad el ngar er a eungel e ng mla mo diak a llemetel el merreder er tir. Se el donguiu e dorrenge a chisir tirke el mle ungil el merreder er a irechar el mo lmuut er a elechang el taem e kede mo metik el kmo, a kmal klou a ultutelel el kerebai el uleba itrkaidid el ungil el merreder a tiakid el tekoi, **tia ng ungil er a rechad el ngar er a eungek, a da ng diak?** Tirke el merreder el mlo iis me a lechub e ng mlo diak el morrenge a tekingel a tirke el merreder el ulebes el kmo a klisiich el uleba a llemalt el bilsterir tirke el chad el mla er a eungel. **(Monguiu er a cheldechederal a Meruk me a Bechars)** Ng ngar er ngii a rebebil er a remerreder el mlodechelakl el kuk di chelechei a uchul. Se el lemengilt a chad el mo merreder e a rechad a kilengei el kmo, ng di ungil a lebo lorreder er kemam. Seikid el taem e a rechad a ua ledilu el kmo, aki meskau a llemalt me a klisiich me ke merrreder er kemam. A chomorreder er kemam e ng kirem el omtebechel e mengkar e mesiou e omekrael er kemam.

A ta er a tekoi el uldimukl er a chelsel a omerreder a ngerachel. A klisiich me a ngerachel el tekoi a diak el sebechel el mo kakeakl. Aika el teblo el tekoi a ua lekaubuch. A lemengilt a chad el mo merreder a kmal klou el ngerachel el lengiluu a rechad el ngililtii el mo oungerachel er tir. Ng kirel el melasem el mo er se el kot el bkul er a bab el sebechel el oltaut a uldesuir a rechad er a eou el oba el mo er a bab.

A omerreder a omuchel er a ongalek. A merreder er a ongalek a oltaut, omesuir, mellach, olsisechakl, mengkar, mesiou e omtebechel er a rechad el ngar er a chelsel a ongalek er ngii.

Se el debo dechelellakl e dosuub er a teletelel a omerreder er kid el oak a siukang er kid e kede mo metik el kmo, ng diak lsa el ngodech er a teletael er a omerreder er a betok el beluu er a beluulechad. A domes er a omerreder er a Merikel, Siabal me a English e te olab a

klisiich me a ngerachel el bisterir a rechad er aike el beluu. Te merreder el oltirakl a uldesuir me a sorir a rechad el millilt er tir.

A omesubed er a omerreder a mo omuchel er a kot er a eou e oba el me er a bab. Kede omuchel er a ongalek, telungalek, kebliil, klebliil, cheldebechel, merreder er a beluu me a merreder er a bita el eanged me a bita el eanged.

ONGALEK- Ng ngera a ongalek? Te reua tehing a ngar er a chelsel a ongalek? A ongalek a ngar er ngii a chedam, chedil me a rengelekir el ulemechell er tir me a cheltekllir me a redellir el ngalek. Tirkaikid a ongalek. A chelsel a ongalek a ngar er ngii a merreder er ngii. Ng chedam me a chedil a merreder er a ongalek.

Klisichel a Chedam. A klisichel a chedam a merreder a chutem, mesei el ousbech, me a udoud, blai, mla me a chelbechielir a rengelekel. A lsekum a chedam a kilengei er a ngelekel el sechal me ng mo bechiil e ng mo bechiil e a lak lekengei e ng diak el sebechel el mo bechiil. A chedam a omes er a ngelekel el sechal el mla mo bechiil e mla mo sebechel el mo ileakl el blai e ng mo eklii a delengcheklel.

Ngerechelel a Chedam. A ngerechelel a chedam a oungerachel el melabek a belsir a rengelekel el sechal. Ng dirrek el oungerachel er blai el lebo lkiei er ngii a rengelekel el sechal a lsekum e ng kilengei er tir el mlo bechiil. A rengelekel el redil a leblo el bechiil e ng mo oungerachel el meruul a uesir.

Klisichel a Chedil. A chedil a kmal klou a klisichel. Ng merreder er a rengalek er a ongalek el mo lmuut er a telungalek.

Ngerechelel a Chedil. A ngerechelel a chedil a omekerreu er a rengalek e meruul a uesir tirke el ruchedal me a rechedal a bechil. A dirrek el ta er a kmal klou el ngerechelel a chedil a mellach e olisechakl er a rengalek er a tekoi er a klechad.

Ngerechelir a Rengalek. A rengalek a dirrek el ngar er ngii a ngerechelir. A rengalek el redil a olengeseu er a chedil el ngar er a mesei me a sers e mangedmokl er a blai. A rengalek el sechal a olengeseu er a chedam el ngar er a chei e meruul aike el ureor el urerir a rsechal er a blai. A ta er a kmal klou el ngerechelir a rengalek a olengesenges er a chedam me a chedil. A olengesenges el tekoi a kired el mo medengelii el kmo, ng kired el oba a ungil reng e meruul aike ledu er kid a delad me a demad. A lsekum me a demad me a lechub e ng delad a oldurech er kid el mo meruul er a tekoi e dekengei e ng di diak debo doruul er ngii e ng diak dolengesenges. Me a lsekum e te oldurech er kid e dekengei me bo doruul er a tekoi e dongiremrum me a lechub e ng kesib a rengud e

meruul er ngii e ng dirrek el diak dolengessenges a tekoi. Se el dolengesenges a tekoi e kede meruul er a tekoi el ngar er a ungil reng.

A ta er a kmal klou el ngerechelir a rengalek a omengull. Tia el omengull a mo er a ngii di el chad, demad, delad, rubekud, ruchelled, ochedad, okdemeled, rubak, mechas, resechelid me a kuk bebil er a rechad. A ta er a ungil el teletelel a omengull a ua tiakid, a lsekum e ke ngalek el sechal e mo er a chei kid me a demam e ng diak kom dengechokl e becherei a demam me lolikes e ke bai melikes e a demam a dengchokl. A chomngalek el redil e lebo er ngii a blengur e ke melai a kall el kelel a demam me a dalam e diak kom dengchokl e a dalam a melai a kall. Aikakid a kuk di bebil er a teletael el kirel a omengull e ngii a kmal dirk betok. A kuk rechad er a beluu e ng ua tiakid a teletael. A lsekum e ke merael er a rael e osiueklii a klou el chad me a lechub e ng rubak ng mechas e ke mo touchakl er a tkul a rael e mecherei me ng merael e kau a mochu merael. A lsekum e ng ngar er ngii a llach er a beluu el kmo ng diak a mengerodech er a beluu e ng diak dongerodech se el doracl. Ng kired el oltirakl er a llechul a beluu.

A ta er a ngerechelir a rengalek a mesuub a tekoi er a klechad. Ng kirel a chedam me a chedil el olisechakl er a rengelekir el kirel tia el tekoi er a klechad. Aikakid a kuk di bebil er a telengtengil a tekoi er a klechad. A ngerechelel a chedam el osisecheklii a ngelekel el sechal er a tekoi er a omenged, el ua omub ng ngera el klekedall a usbechal se el domub. A chedil a ngerechelel el osisecheklii a ngelekel el redil er a teletelel a omeruul el mesei me a omeruul el ongraol. Aika a kuk di bebil e ngii a betok a teletelel a klechad a kired el mo medengei e ng mochu sebechem el mo di kau.

Chelechang el taem e ng kmal klou a omelekoi er a remeklou el chad er a beluu me a rebibil er a demerir me a derrir a rengalek el kmo, a rengalek er a chelecha el taem a di kea longull er a remeklou el chad er a beluu me a rechad er a blirir. Tia ng locha mera el tekoi me a lechub e ng diak? A domdasu er tia el tekoi e ng locha mera el ua isei e le ng tiakid a uchul. A rengalek er a chelecha el taem a mla mo ousbech a beches el uldasu el uldesuir a rengebard. Te omdasu el kmo, a remeklou el chad er a beluu me a rechedam me a rechedil a diak a ngera el lodengei el kirel a teletael me a uldasu er a Ngebard. A rengalek a mla mo omdasu el kmo, kede mla mo mimokl el ngar er a eungel a beches el kabelment me a llach me a tekoi er a irechar a mla mo diak a belkul. Tia ng klemarang? A rebibil er a rechad a mla mo mimokl e mla mo er ngar er ngii a bechas el llach me a uldasu e ng di diak el belkul a kmo, aika el tekoi er a irechar a

mekngit el rokui me ng diak a belkul el doltirakl. Ng ngar er ngii a ungil me a kuk mla mo mekngit er a teletael er a delengchokl er a chelecha el taem a doltirakl. E dirrek me a uldasu er a Ngebard me ng ua isei. A ta er a tekoi el ungil el bla lobes er ngii a rengalek a omengull. A omengull a tekoi er a bek el beluu er a beluulechad el di mla ngar er ngii er kid er a irechar el me lmuut er a chelecha el taem. Me a beches el uldasu a diak el du el ua se kede choitii a omengull. A rengalek a omdasu el ua isei e ng di ngii a diak el ua isei. A leua isei e a rengalek er a chelecha el taem a melilt aike el ungil er aike el beches el uldasu me kede mo ousbech e aike el mekngit a dechoit. Ng di osisiu ngii me aike el mechut el uldasu, kede ngmai a ungil me kede ousbech e chemoit a mekngit.

TELUNGALEK

Te ngera a ngar er a chelsel a telungalek? A chelsel a telungalek a ngar er ngii a chedam, chedil, rengelekir me a rengelekir a rengelekir. A telungalek a ua loldak a eru el ongalek. Aika el ongalek a kakerous. A merreder er a telungalek a chedam me a chedil. Tirke el ngelekir a rengelekir el redil a kuk ngar er ngii a demerir el merreder er tir. Ngika el demerir a di merreder a delengchokl me a chelebechielir me a kerrekerngir el udoud me aike el rokui el dubech el kirel tirka el nglekel. A kmal klou a klisichel er a omerreder a ngike el chedil er se el kot el onglak.

UCHELEL A KEBLIIL

A kebliil a di ua cheldechedechal a uchelel a Belau el diak desa el medengei el kmo ng dilubech er a oingerang. Ng di ngar er ngii a cheldecheduch el chelid el mesaod er a uchelel a kebliil. Tia el cheldecheduch a dirrek el ulemuchel er a Ngeaur.

A ta er a klebesei e a Kebliil, Seked, Dedaes me a Techebngir a mla er a Ngeaur el mo er a Beliliou. A leme er a Beliliou e te mlo er a Iretech er a Ngesileong er a Ngerdelolek. Te mla er a Ngerdelolek e ng mlo dioll a Kebliil e mlechell er a reteua el ngalek. Tirka el ngalek a mlo meklou e mlocha sebechir el ileakl el delengchokl. Te mle kakeakl a delengcheklir e ng di te di uleba a derrir el ua lolochotir el kmo te di rengelekel a ta el redil. Tiakid a uchul me kede mesaod er a kebliil el kmo ng klauchad el okiu a rasech. A kebliil a moak er a klauchad er a omerael me a klaodengei me a klaingeseu er a rechad er a irechar. Me a le ua isei e a kebliil a ulterkokl a ta el chad el merreder er ngii e a klebeliil a diak.

KEBLIIL

Ng ngera a kebliil? A kebliil a klauchad el oltirakl er a rasech me a leua isei e a rengelekir a ruchad me a rudam me a renglekir a rengelekir tirkaikid a uldimukl er a keblii.

A ngklel a kebliil a bo dosiik er ngii e ng oltirakl er a ngklel a uchelel a omesolel a blai. Tia se er a kmal irechar e a rechad er a Belau a milrael a beluu. A lsekum a ongalek a kiliei er ta er a beluu e melkl el mo er a ta er a beluu el kuk mo melibech er a beches el delengecheklir e se el chutem el bo el kiei er ngii a

tekinged.com is aware that this book ends abruptly in the middle. Unfortunately the copy that we received had missing pages at the end. If anyone has or can find these missing pages, please email them to info@tekinged.com so that we can complete this otherwise amazing book.